

NAQQIUT

Taarsissavaa siunnersuut ullulerneqartoq 10. august 2018

Tunngavilersuut

UKA 2018/196-imi kukkunersiuisoqarneratigut § 4 allannguuteqartinneqarpoq.

Inatsisissatut siunnersuummut nassuiaatit

Nassuiaatit nalinginnaasut

1. Aallaqqaasiut

2017-imi ukiakkut Inatsisartut ataatsimiinneranni Soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaat aamma Pigisanit pissarsiat ilaasa akileraaruserneqartarnerat pillugu Inatsisartut inatsisaat akuersissutigineqarput (UKA 2017/88 aamma 89).

Inatsisartut inatsisaasa imaraat, soraarnerussutisiaqalernissamut ileqqaakkanit iluanaarutit amerlanerpaartaatigut 15,3 procentinik akileraaruserneqartassasut. Soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaanni ilaapput soraarnerussutisiaqalernissamut aningaasaateqarfiit Kalaallit Nunaanniittut, aappaanili Pigisanit pissarsiat ilaasa akileraaruserneqartarnerat pillugu Inatsisartut inatsisaanni ilaallutik soraarnerussutisiaqalernissamut aningaasaateqarfinni nunani allaniittuni soraarnerussutisiaqalernissamut ileqqaakkat ilai il.il. kiisalu Kalaallit Nunaanni aningaaserivinni soraarnerussutisiaqalernissaq siunertaralugu ileqqaakkat.

2017-imi ukiakkut ataatsimiinnermi Inatsisartut inatsisaasa taakku marluk akuersissutigineqarnissaat sioqquutilaarlugi, Naalakkersuisut Grønlandsbankenimit saaffiginnissummik tigusaqarput, aningaaseriviup siunissami IT-kkut inerisaasariaqarnissaanut annertuumik aningaasartuuteqarnerusoqarnissaa eqqarsaatigalugu, aningaaseriviit Soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaannut ilanngunnagit Pigisanit pissarsiat ilaasa akileraaruserneqartarnerat pillugu Inatsisartut inatsisaannut ilanngunneqarnissaannik qinnuiginnissummik.

Grønlandsbanken ilisimatinneqarpoq, Inatsisartut inatsisaannut taakkununnga marlunnet naleqquttumik allannguutissatut siunnersuuteqarnissaq pisinnaanngitsoq, piffissap sivikippallaarnera pissutigalugu, soorlu 2018-imut aningaasanut inatsit eqqarsaatigalugu siunnersuutit 2018-imi upernaakkut ataatsimiinnissamut kinguartinneqarsinnaanngitsut. Taarsiullugu neriorsuutigineqarpoq, Grønlandsbankenip kissaatai eqqortinniarlugit, 2018-imi

upernaakkut ataatsimiinnermut siunnersuummik suliaqartoqassasoq. Inatsisartunut qinersisoqarnera peqputigalugu Inatsisartut upernaakkut 2018-imi ataatsimiinnissaat taamaatiinneqarmat siunnersuut matumani pineqartoq Inatsisartut ukiakkut 2018-imi ataatsimiinnissaani saqqummiunneqassaaq.

Siunnersuutittaaq Soraarnerussutisiaqalernissamut aningaasaatit ilaannit pissarsiat akileraarusersorneqartarnerat pillugu Inatsisartut inatsisaata allanngortinneqarnera pillugu Inatsisartut inatsisaannut ataatsikkut saqqummiunneqartumut atatillugu isigineqassaaq.

2. Siunnersuummi immikkoortut pingaarnerit

Siunnersuutigineqarpoq, Inatsisartut inatsisaata atuuffia annikillisinneqassasoq taamaasilluni, soraarnerussutisiaqalernissaq siunertaralugu ileqqaakkat Pigisanit pissarsiat ilaasa akileraarusersorneqartarnerat pillugu Inatsisartut inatsisaat naapertorlugu akileraarusersorneqassaarlutik, kisiannili Soraarnerussutisiaqalernissamut aningaasaatit ilaannit pissarsiat akileraarusersorneqartarnerat pillugu Inatsisartut inatsisaat naapertorlugu akileraarusersorneqartalissasut, tak. tamatumunnga siunnersuut ataatsikkut saqqummersinneqartoq.

Allannguut tamanna Inatsisartut inatsisaani aalajangersakkani allani allannguuteqartoqarnissaanik kinguneqassaaq. Ilaatigut § 9-imi pineqaatissiisarnermut aalajangersagaq sunniutaasumik iluarsineqassasoq siunnersuutigineqarpoq.

Tamatumunnga ilassutigalugu § 8-p allanngortinneqarnissaa siunnersuutigineqarpoq, taamaasilluni § 4-mut innersuussineq aalajangersakkami oqaasertaliornermik annertunerusumik taarserneqarluni.

PFA Pension-imit siunnersuuteqarneq malillugu soraarnerussutisiaqarsinnaatitaasut aamma soraarnerussutisiaqartitsisartut periaaseq alla inatsimmi § 3, imm. 1 malillugu pisussanit allaanerusoq malillugu pissarsianik naatsorsuinnermut toqqarsinnaagaat, ammaanngarpoq. Taamaalilluni siunnersuutigineqarpoq, pissarsiat periaaseq soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaanni § 3 malillugu atorngartussaq malillugu naatsorsorneqarsinnaassasut. Naggataatigullu siunnersuutigineqarpoq, allannguutit 1. juli 2018-imi atortuulissasut ukiumilu aningaasarsiorfiusumi 2018-imi atuutissallutik. Tamatumani eqqarsaatigineqarpoq, ilaasunut tamanut, matumani innuttaasut, soraarnerussutisiaqalernissaq siunertaralugu ileqqaagaqartunut, Soraarnerussutisiaqalernissamut aningaasaatit ilaannit pissarsiat akileraarusersorneqartarnerat pillugu Inatsisartut inatsisaata ataaniinnissaq ajornannginnerullunilu akikinnerussammat. Saniatigut eqqarsaatigineqarput naatsorsuinerit takutimmasuk, Pigisanit pissarsiat ilaasa akileraaruserneqartarnerat pillugu Inatsisartut inatsisaani malittarisassat imaluunniit Soraarnerussutisiaqalernissamut aningaasaatit ilaannit pissarsiat akileraarusersorneqartarnerat pillugu Inatsisartut inatsisaanni malittarisassat malillugit akileraarut naatsorsorneqarpat, innuttaasunut assigiinngissuteqassanngimmat imaluunniit annikitsuinnarmik assigiinngissuteqassasoq.

Inatsisissatut siunnersuut inatsimmut atuuttumut sanilliullugu	
<i>Oqaasertai atuuttut</i>	<i>Inatsisissatut siunnersuut</i>
	§ 1
	Pigisanit pissarsiat ilaasa akileraaruserneqartarnerat pillugu Inatsisartut inatsisaanni nr. 37, 23. november 2017- imeersumi makku allannguutigittinneqarput:
<p>§ 1. Soraarnerussutisiaqarsinnaatitaasut, aningaasarsianit akileraarutit pillugit Inatsisartut Inatsisaanni (aningaasarsianit akileraarutit pillugit inatsit) § 1, imm. 2. imaluunniit 2, imaluunniit imm. 2 naapertorlugit akileraaruteqartussaasut, kiisalu nunami allami, Danmarkimi imaluunniit Savalimmiuni, marloqiusamik akileraartannginnissamik isumaqatigiissummi aalajangersakkat naapertorlugit, nunaqavissutut isigineqarsinnaangitsut Inatsisartut Inatsisaat manna naapertorlugu iluanaarutinit akileraaruteqartassapput, tassa soraarnerussutisiaqalernissaq siunertaralugu ileqqaakkanit aningaaserivinni Kalaallit Nunaanni angerlarsimaffeqartuni imaluunniit aalajangersimasumik ingerlatsiveqartuni pilersinneqarsimasuni, kiisalu inuunermik sillimmasiisarfinit aamma soraarnerussutisiaqalernissamut aaqqissuussinernit iluanaarutinit, taakku aningaasarsianit akileraarutit pillugit inatsimmi § 39 a, imm. 1-imi aamma 2-mi piumasagaatinit naammassinnissimagunik aamma aaqqissuussinernit § 53 A-mi soraarnerussutisiaqalernissamut aaqqissuussinernit il.il. akileraarusiisarneq pillugu danskit inatsisaanni ilaatinneqartut.</p>	<p>1. § 1, imm. 1, ima oqaasertaqarpoq: ”§ 1. Soraarnerussutisiaqarsinnaatitaasut aningaasarsianit akileraarutit pillugit Inatsisartut inatsisaanni (akileraartarnermi inatsimmi) § 1, imm. 1, nr. 1 imaluunniit 2, imaluunniit imm. 2 naapertorlugu akileraartussaasut, aammalu marloriaammik akileraarnissaq pinngitsoorniarlugu isumaqatigiissummi aalajangersakkat naapertorlugit naalagaaffimmi takornartami, Danmarkimi imaluunniit Savalimmiuni angerlarsimaffeqartutut isigineqanngitsut, inuunermut sillimmasiissutit aamma soraarnerussutisiaqarnissamut aaqqissuussinernit aningaasarsianit akileraarutit pillugit Inatsisartut inatsisaanni § 39 a, imm. 1-imi 2-milu piumasagaatinik naammassinnittut, aamma aaqqissuussinernit danskit soraarnerussutisiaqarnissamut aaqqissuussinernit il.il. akileraaruserneqartarnerat pillugu inatsisaanni § 53 A-mi pineqartut iluanaarutaannit akileraarutinit, Inatsisartut inatsisaat manna malillugu akiliissapput.”</p>

<p><i>Paasissutissanik nalunaarutiginninneq</i></p>	<p>2. § 3 malillugu qulequtaq ”<i>Paasissutissanik nalunaarutiginninneq</i>” atorunnaarsinneqarpoq.</p>
<p>§ 4. Kingusinnerpaamik februaarip aallaqqaataani aningaaseriviit §1, imm. 1-imi taaneqartut ukiup siuliani aningaasarsiaqarfiusumi akileraartarnermut aqutsisoqarfimmuut paasissutissat makku nalunaarutigissavaat:</p> <p>1) kontumik piginnittup aqqa, najugaa aamma inuup normua,</p> <p>2) ukiup aallartinnerani aamma naanerani uninngasuutit, kiisalu</p> <p>3) ukiup ingerlanerani iluanaarutit, tak. § 3.</p> <p><i>Imm. 2.</i> Konto matusimagaluarpat, allamut nuussimagaluarpat assigisaanilluunniit paasissutissat nalunaarutigineqassapput.</p> <p><i>Imm. 3.</i> Paasissutissat imm. 1-imi 2-milu taaneqartut tunniunneqartarnerat pillugu malittarisassanik sukumiinerusunik Naalackersuisut aalajangersaasinnaapput.</p>	<p>3. § 4 imatut oqaasertaqarpoq: ” § 3 apeqquataatinnagu pissarsiat soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaanni § 3 malillugu naatsorsorneqarsinnaapput. § 3 malillugu imaluunniit aalajangersagaq manna malillugu pissarsiat naatsorsorneqarnissaannik toqqaaneq, ukiumi isertitaqarfiusumi tullermi allanngortinneqarsinnaanani pisussaaffillivoq. Ukiumi isertitaqarfiusumi akileraartussaataitanerup atuutilerfiani imaluunniit atorunnaarfiani, ukioq isertitaqarfiusoq qaammatisiutit malillugit ukiumi akileraartussaataaaffiusumi ilaavoq.</p> <p><i>Imm. 2.</i> Aaqqissuussami pissarsiat amigartoorutaasut ukiumi isertitaqarfiusumi pineqartumi aammalu ukiuni isertitaqarfiusuni 10-ini tullerni aaqqissuussami ataatsimi pissarsiani sinneqartoorutaasuni taamaallaat ilanngaatigineqarsinnaapput. Pissarsia amigartoorutaasut, ukiuni isertitaqarfiusumi siusinnerusumiittumi pissarsiani sinneqartoorutaasuniitinneqarsinnaanngippata, aatsaat ukiumut isertitaqarfiusumut kingusinnerusumiittumut ingerlatinneqarsinnaapput.”</p>
<p>§ 8. Inuunermik sillimmasiinernik aamma soraarnerussutisiaqalernissamut aaqqissuussinernik nioqquteqartunik, aningaasarsianit akileraarutit pillugit inatsimmi § 39 a, imm. 1 aamma 2 naapertorlugit kiisalu soraarnerussutisiaqalernissamut aaqqissuussinernik akileraarusiisarneq pillugu qallunaat inatsisaanni § 53 A-mi aaqqissuussinerni ilanngunneqartuni il.il.</p>	<p>4. § 8, <i>imm. 1</i>, ima oqaasertaqarpoq: ”§ 8. Naalackersuisut inuunermut sillimmasiissutinik aamma soraarnerussutisiaqarnissamut ileqqaakkanik, aningaasarsianit akileraarutit pillugit Inatsisartut inatsisaanni § 39 a, imm. 1-imi 2-milu piumasaqaatinik naammassinnittunik, aamma aaqqissuussinernik danskit soraarnerussutisiaqarnissamut aaqqissuussinerit il.il.</p>

<p>piumasaqaatinik naammassinnittunik paasissutissanik nalunaaruteqartarneq § 4, imm. 1-imi taaneqartoq pillugu Naalakkersuisut isumaqatigiissuteqarsinnaapput.</p>	<p>akileraaruserneqartarnerat pillugu inatsisaanni § 53 A-mi pineqartunik neqerooruteqartut, makku pillugit paasissutissanik nalunaaruteqartarnissaannik isumaqatigiissuteqarfigisinnaavaat: 1) kontumik piginnittut ataasiakkaat aqqi, najugaat aamma cpr-normui, 2) ukiup aallartinnerani naanerani uningasuutit, aamma 3) ukiumi iluanaarutit, tak. § 3.”</p>
	<p>5. § 8-mi imm. 3-tut ilanngunneqarpoq: ” Imm. 3. Naalakkersuisut paasissutissanik tunniussisarneq, akileraarutitik unerartitsisarneq akiliisarnerlu il.il., imm. 1-imi 2-milu taaneqartut pillugit maleruagassanik sukumiinerusunik aalajangersaasinnaapput.”</p>
<p>§ 9. Piaaraluni imaluunniit mianersuaalliorujussuarluni § 1, imm. 1-imik, § 4-mik aamma § 5-imik unioqqutitsineq, Kalaallit Nunaanni Pinerluttulerinermi inatsit naapertorlugu pineqaatissinneqaataasinnaavoq.</p>	<p>6. § 9, imm. 1, ima oqaasertaqarpoq: ”§ 9. § 1, imm. 1-imik aamma § 5-imik piaaraluneerluni mianersuaalliorujussuarluniluunniit unioqqutitsineq Kalaallit Nunaanni pinerluttulerinermik inatsimmi maleruagassat malillugit akiliisitsinermik pineqaatissiissutigineqarsinnaavoq.”</p>
<p>§ 11. Inatsisartut inatsisaat ulloq 1. januar 2019 –imi atuutilissaaq*.</p> <p>*2017-imi aningaasanut inatsimmi oqaasertaliussamik matuma kinguliani allassimasunik imalimmik ilanngussisoqarnissaa Aningaasaqarnermut Akileraartarnermullu Ataatsimiititaliap 27. december 2017-imi ataatsimiinnermini aalajangigaq nr. 01.31.06/17 – 0078-ikkut aalajangiuppaa:</p> <p>"Pigisanit pissarsiat ilaasa akileraaruserneqartarnerat pillugu Inatsisartut inatsisaat nr. 37, 23. november 2017-</p>	<p>7. § 11 ima oqaasertaqarpoq: ” § 11. Inatsisartut inatsisaat ulloq 1. januar 2018-imi atuutilissaaq.”</p>

<p>imeersoq ulloq 1. januar 2018-imi atuutilissaaq."</p> <p>Oqaasertaliussaq 2017-imi ilassutitut aningaasaliissutitut inatsisissatut siunnersuummi ilanngunneqassaaq.</p>	
	<p style="text-align: center;">§ 2</p> <p>Inatsisartut inatsisaat 1. juli 2018-imi atortuulissaaq.</p> <p><i>Imm 2.</i> ukiumiillu aningaasarsiorfiusumit 2018-imiit atuutissaaq.</p>

3. Pisortanut aningaasaqarnikkut allaffissornikkullu sunniutissai

Inatsisartut inatsisaata atuuffiata annikillinerata Inatsisartut inatsisaannik iluanaarutit ukiumi siullermi 1-4 mio. kr.-inut tagginneqartunik annikillisissavai. Appariarneq Soraarnerussutisiaqalernissamut aningaasaatit ilaannit pissarsiat akileraarusersorneqartarnerat pillugu Inatsisartut inatsisaannik iluanaarutit qaffannerisigut naligiisinneqassaaq. Ataatsimut isigalugu allannguutit taakku iluanaarutitut sunniuteqanngingajassasut naatsorsuutigineqarpoq.

Allaffissornikkut allannguut akileraartarnermut ingerlatsivimmuut oqilisaataassaaq, tassani aningaaseriviit allaffissornikkut akiliisitsiniartarnernillu suliassat annertuut tigussammattigik. Missingerneqarpoq, ukiumut inuup ataatsip piffissami tamakkiisumi sulineranik sipaaruteqartoqassasoq.

4. Inuussutissarsiornermut aningaasaqarnikkut allaffissornikkullu sunniutissai

IT-mik aqqissuussinernik ineriartortitsinermut, ingerlatsinermut aserfallatsaaliinermullu atatillugu siunnersuut aningaaserivinnut annertuumik sipaaruteqaataassasoq nalilerneqarpoq. Sipaartit millioninik amerlanerussasut aningaaserivinnit missingerneqarpoq.

5. Avatangiisinut, pinngortitamut inuillu peqqissusiannut sunniutissai

Siunnersuut avatangiisinut, pinngortitamut inuillu peqqissusaannut sunniuteqassanngilaq.

6. Innuttaasunut sunniutissai

Bank Nordikip kiisalu GrønlandsBankenip naatsorsuinerisa takutippaat, Pigisanit pissarsiat ilaasa akileraarusersorneqartarnerat pillugu Inatsisartut inatsisaat naapertorlugu imaluunniit Soraarnerussutisiaqalernissamut aningaasaatit ilaannit pissarsiat akileraarusersorneqartarnerat pillugu Inatsisartut inatsisaat naapertorlugu akileraarutip naatsorsorneqartarnerani assigiinnngissuteqanngitsoq imaluunniit annikitsuaraannarmik assigiinnngissuteqarpoq.

Inatsimmi siullermi imaluunniit aappaani akileraarutitut naatsorsueriaatsit allassimasut aallaavigalugit akileraarutissanik naatsorsuinerni soraarnerussutisiaqarnissamut ileqqaagaqartunut ataasiakkaanut pitsaanngitsumik sunniuteqarnaviannngitsoq aningaaserivinnit nalilerneqarpoq.

Soraarnerussutisiaqarnissamut ileqqaartut sisamat 2016-imi pissarsiaat tunngavigalugit naatsorsuinerit suliarineqarput. Naatsorsuinerit skemami ataaniittumi paasinarsarlugit takutinneqarput:

	A	B	C	D
2016-ip aallartinnerani aningaasaatit	1.690.892 kr.	501.748,79 kr.	79.345,37 kr.	220.579,04 kr.
Ukiumi akiliutit	7.158 kr.	2.124 kr.	52.000 kr.	0 kr.
Ukiumi kingullermi pissarsianit akileraarutit akilerneqartut	28.131 kr.	8.347,46 kr.	1.286,33 kr.	64,93 kr.
Akitsuutit akilerneqartut	2.401 kr.	712,50 kr.	93,75 kr.	0 kr.
Aningaasat tigusat	0 kr.	0 kr.	0 kr.	0 kr.
2016-imi tamakkiisumik pissarsiat	32.822 kr.	9.739,00 kr.	1.176,55 kr.	109,24 kr.
2016-ip naanerani aningaasaatit	1.700.340 kr.	504.551,83 kr.	131.141,84 kr.	220.623,35 kr.
Pigisanit pissarsianut akileraarut (15,3 pct.)	5.022 kr.	1.490,07 kr.	180,01 kr.	16,71 kr.
PAL-imut akileraarut (15,3 pct.)	4.875 kr.	1.446,57 kr.	179,78 kr.	16,71 kr.
Nikingassut	147 kr.	43,50 kr.	0,23 kr.	0 kr.

* Tak.: Akileraarummut akiliutip ukiumut 0-imiit 147 kr.-illu akornani appariaateqarfiusutut tabeli atuarneqassaaq.

Siunnersuutip innuttaasut allaffissornikkut oqilisaaffigineqarneranik nassataqassaaq, akileraarutinimmi nalunaarutiginninnissat akiliinissallu innuttaasut nammineerlutik isumaginnissanngimmata.

7. Sunniutissat allat annertuut

Siunnersuut allanik annertuunik sunniutissaqanngilaq

8. Oqartussaasunik kattuffinnillu il.il. tusarniaaneq

Siunnersuut aammalu Soraarnerussutisiaqalernissamut aningaasaatit ilaannit pissarsiat akileraarusersorneqartarnerat pillugu Inatsisartut inatsisaata allanngortinneqarnera pillugu Inatsisartut inatsisissaannut siunnersuut ilanngullugu piffissami 2018-imi 17. maj-imiit 15. juunimut tusarniaassutigineqarpoq ukunani: SISA, PFA Soraarnej, Sulisitsisut (GE), NUSUKA, KNAPK, SIK, IMAK, ASG, PPK, AK, NPK, KANUKOKA, Kommune Kujalleq, Kommuneqarfik Sermersooq, Qeqqata Kommunia, Qaasuitsup Kommunia, Grønlandsbanken, Bank Nordik, Forsikring og Pension, Naalakkersuisut Siulittaasuata Naalakkersuisoqarfia, Inuusutissarsiornermut, Suliffeqarnermut, Niuernermut Nukissiuuteqarnermullu Naalakkersuisoqarfik, Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoqarfik

Tusarniaanermut akissutit ukunannga tiguneqarput: Naalakkersuisut Siulittaasuata Naalakkersuisoqarfia, Sulisitsisut (GE), Bank Nordik, GrønlandsBanken, IMAK, SISA, PFA Pension, Qeqqata Kommunia aamma ASG.

Tusarniaaffigisat oqaaseqaataannit pingaarnersiukkat allannermik nalinginnaasumik ataani allassimasumi allanneqarput, Naalakkersuisut oqaaseqaataallu allannermik *kipungasumik* allannilimmik allassimallutik.

PFA Pension (PFA) siunnersuutigaa aalajangersakkamik ilanngussisoqassasoq, pissarsiat akileraaruteqaataasussat naatsorsorneqarneranni periaatsit pingasut akornanni toqqaanissamut, aammalu danskit aamma kalaallit soraarnerussutisianik aaqqissuussinerinut periaatsini pingasuni taakkunani tamaginni naatsorsuinerup assigiimmik pisinnaanissaanut, danskit soraarnerussutisianik akileraarusiisarnermut inatsisaanni § 53 a, imm. 3 malillugu periarfissat assinginik periarfissiisumik. Taamaangippat IT atorlugu periaatsinik allanngortitsinnermut annertoorujussuarnik aningaasartuuteqartoqartussanngussaaq.

Tamatuma saniatigut nunani allani paasissutissanik paarlaasseqatigiittarnermut danskit soraarnerussutisiaqartitsisarfiinit nalunaarutiginnittarnerit (CRS) Kalaallit Nunaanni akileraartitsisarfiup 2020-imiit atulertussaagai PFA-p paasivaa, kisianni naatsorsuinnermut periaatsit pingasut taakkua, danskit soraarnerussutisiaqartitsisarfiisa soraarnerussutisianik akileraarusiisarnermut danskit inatsisaanni § 53a imm. 3 naapertorlugu toqqarsinnaasai,

Inatsisartut inatsisaanni atorneqarsinnaalersinneqarpata tamanna aatsaat periarfissaalertussaavoq.

Siunnersuut ilaannakortumik ilanngunneqarpoq. Periaatsip danskit soraarnerussutisianit pissarsianik akileraarusiissarnermut inatsisaanni § 4-imi ilaatinneqartup, soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaanni ilanngunneqarsimannginnera, ilanngussinermi eqqarsaatigineqarpoq.

Soraarnerussutisiaqarsinnaatitaasut aamma soraarnerussutisiaqartitsisartut tamatuma malitsigisaanik, pissarsianik naatsorsuinermit periaatsit marluk akornanni toqqaanissamut taamaallaat periarfissaqalissapput. Ilasutigalugu oqaatigineqassaaq, PFA-mit siunnersuuteqarneq malillugu danskit soraarnerussutisianit pissarsianik akileraarusiissarnermut inatsisaanni § 4, soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaanni § 3-ip suliarineqarnerani, inatsimmi tassani § 4 a-mit taarserneqarmat, tassani danskit inatsisaanni § 4 a naleqqunnerpaatut isigineqarmat.

Aammattaaq pissarsiat amigartoorutaasut ingerlateqqinnissaannut ukiunik 10-inik maannakkut killiliinerup ingerlateqqinneqarnissaa eqqornerpaasorineqarpoq. Killiliinermi aningaasarsianit akileraarusiissarnermut inatsimmi § 30, imm. 1 tunngavigineqarpoq, tassami taamaattoq piffissamut killiliussaq oqaatigineqareersutut siunnersuummi matumani ukiunut 10-inut aalajangersarneqassasoq siunnersuutigineqarluni.

Aningaaseriviit maannakkut PAL-imi akileraarusiissarnermik atuinissamut periarfissaqalernerat neriulluarnartoq GrønlandsBANKEN isumaqarpoq. Aningaaserivik naliliivoq allanngortitsinissamik siunnersuuteqarneq Kalaallit Nunaanni aningaaserivinni, Namminersorlutik Oqartussani allaffissornermi annertuunik sipaaruteqarnerannik malitseqassasoq, taamaalillunilu Kalaallit Nunaanni soraarnerussutisiassanik ileqqaarnermi sipaaruteqartoqassasoq.

Allanngortitsinissamik siunnersuut pillugu tusarniaanerup ingerlaneranut tunngatillugu pilersitsiviulluarnarujussuarmik ingerlasoqarneranut GrønlandsBANKEN uppersaarusuppoq.

Tusarniaavigineqartut allat siunnersuutinut oqaaseqaateqanngillat.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Allannguutip nassatarissavaa, soraarnerussutisiaqalernissaq siunertaralugu ileqqaakkat aningaaserivinni, Kalaallit Nunaanni aalajangersimasumik ingerlatsiveqartuni kiisalu nunami maani aningaaserivimmik ingerlatsinissamut Finanstilsynet-imit akuersissummik pigisaqartuni pilersinneqartut, Inatsisartut inatsisaannit ilaatinneqarunnaassammata.

Paarlaattuanilli soraarnerussutisiaqalernissaq siunertaralugu ileqqaakkat Kalaallit Nunaanni aningaaserivinniittut tamarmik Soraarnerussutisiaqalernissamut aningaasaatit ilaannit pissarsiat akileraarusersorneqartarneri pillugit Inatsisartut inatsisaanni ilaatinneqalissapput.

Nr. 2-mut

Torsaarnissamut tunngasumik allangortitsineq tassani pineqarpoq.

Nr. 3-imut

§ 3, imm. 1-imi periaaseq malillugu pissarsiat akileraaruteqaataasussat naatsorsorneqarnissaannut taarsiullugu, soraarnerussutisiaqarsinnaatitaasut aamma soraarnerussutisiaqartitsisartut pissarsianik soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaanni § 3-imi naatsorsorneqartarnerattut naatsorsuisinnaalissasut, siunnersuutigineqarpoq. Naatsorsuinnermut periaatsimik toqqaaneq ukiup isertitaqarfiusup tulliani allangortinneqarsinnaanani pisussaaffiliivoq.

Aaqqissuussami pissarsiat amigartoorutaasut ukiumi isertitaqarfiusumi pineqartumi aammalu ukiuni isertitaqarfiusuni 10-ini tullerni aaqqissuussami ataatsimi pissarsiani sinneqartoorutaasuni taamaallaat ilanngaatigineqarsinnaapput. Pissarsiat amigartoorutaasut, ukiuni isertitaqarfiusumi siusinnerusumiittumi pissarsiani sinneqartoorutaasuniitinneqarsinnaanngippata, aatsaat ukiumut isertitaqarfiusumut kingusinnerusumiittumut ingerlatinneqarsinnaapput.

§ 4-ip oqaasertalerneqarnerata allangortinneqarnerata kingunerisaanik aningaaserivinnut paasissutissisussaataaneq atorunnaarsinneqarpoq. Atorunnaarsitsinnermut pissutaavoq, ileqqaarutit Kalaallit Nunaanni aningaaserivinni soraarnerussutisianut siunertaqartut, inatsimmi pineqartunut ilaajunnaarnerat.

Nr. 4-mut

§ 4, imm. 1-imut atorunnaarsinneqartumut innersuussineq, paasissutissat suut isumaqatigiisummut ilaatinneqarnerinik nassuiaammik taarserneqassasoq siunnersuutigineqarpoq.

Nr. 5-mut

Paasissutissanik tunniussisarneq, akileraarutininik unerartitsisarneq akileraarutinillu akiliisarneq pillugit Naalakkersuisut nalunaarummik atulersitsinissaannut piginnaatinneqassasut siunnersuutigineqarpoq, soorlu imm 1 aamma 2-mi eqqaaneqartut aalajangersakkami..

Nalunaarutip ilaatigut imarisinnaavai nalunaarutininik tunniussinissamut piffissaliussanik aalajangersaanerit, nalunaarutininik tunniussinissami najoqqutassianik aalajangersaanerit, aamma akileraarutininik akiliinissat assigisaallu.

Nr. 6-imut

§ 4 atorunnaarsinneqarmat, siunnersuutigineqarpoq § 9, imm. 1, tamatumunnga naleqqussarlugu iluarsineqassasoq.

Nr. 7-imut

Pigisanit pissarsiat ilaasa akileraaruserneqartarnerat pillugu Inatsisartut inatsisaat nr. 37, 23. november 2017-imeersoq (UKA2017/89) Inatsisartut 2017-imi ukiakkut ataatsimiinnerminni akuersissutigaat.

Inatsisip ulloq atuutilerfissaa inatsisip atuutilerfissaa pillugu aalajangersakkat inatsisillu oqaasertaasa kalaallisuuani danskisuuani assigiinngitsut inatsisip akuersissutigineqarnerata kingorna paasineqarpoq. Inatsisip danskisuuani inatsisip ulloq atuutilerfissaa inatsisip oqaasertaani eqqortumik nalunaarneqarpoq, tassalu 1. januar 2018, inatsimmullu nassuiaatini 1. januar 2019-imik nalunaarneqarluni, tamannalu eqqunngilaq. Kalaallisuuani akerlerluinnaannik allassimapput. Taamaalillunilu inatsisip inissisimaffia siunertaanngitsumik erserterluttoq ilanngunneqarpoq.

Inatsit taaneqartoq ulloq 1. januar 2018-imi atuutilissasoq anguniagaasimavoq. Tamanna ilaatigut takussutissaqarpoq 2018-imi aningaasanut inatsisissatut siunnersuutip pingajussaaneerneqarnissaanut allannguutissatut siunnersuutip akuerineqarneratigut, tamatumani inatsisip ulloq 1. januar 2018-imit atuutilernissaa aallaavigalugu isertitassat missingerneqarlutik.

Tamanna tunngavigalugu pigisanit pissarsiat ilaasa akileraaruserneqartarnerat pillugu inatsit naapertorlugu inatsisikkut tunngavigisap 1. januar 2018-imit atuutilereernissaata ersarissuunissaa qulakkeerniarlugu oqaasertaliussaq akuerineqarpoq.

Oqaatsini marluusuni inatsisip aamma nassuiaatit oqaasertaasa aammalu oqaasertaliussami piffissap atuutilerfissaata erseqqissarneqarnerata imminnut naapertuunnissaasa qulakkeerneqarnissaa siunertaralugu, aalajangersagaq nutaamik iluseqartillugu oqaasertaliinissaq siunnersuutigineqarpoq.

§ 2-mut

Siunnersuutigineqarpoq, Inatsisartut inatsisaat 1. juli 2018 atortuulissasoq kiisalu ukiumi aningaasarsiorfiusumi 2018-i aallarnerfigalugu atuutilissalluni.

Taamaasilluni eqqarsaatigineqarpoq, ilaasunut tamanut, matuma ataani innuttaasunut, soraarnerussutisiaqalernissaq siunertaralugu ileqqaagaqartunut, ileqqaakkanit pissarsiat akileraarusersorneqarnerisa isumaginissaanut tunngaviusunik, IT-kkut programminik pioreersunik atuinissaq ajornannginnerullunilu akikinnerussasoq. Saniatigut eqqarsaatigineqarput naatsorsuinerit takutimmassuk, Pigisanit pissarsiat ilaasa akileraaruserneqartarnerat pillugu Inatsisartut inatsisaani malittarisassat imaluunniit Soraarnerussutisiaqalernissamut aningaasaatit ilaannit pissarsiat akileraarusersorneqartarnerat pillugu Inatsisartut inatsisaanni malittarisassat malillugit akileraarut naatsorsorneqarpat, innuttaasunut assigiinngissuteqassanngimmat imaluunniit annikitsuinnarmik assigiinngissuteqassasoq.